



PRÉZIDÊNSIA
KONSELLU
MINISTRUS

Aprezentasaun “Relatóriu kona-ba moris-kiak iha Timor-Leste - 2014”

Diskursu abertura husi Ministru Estadu no Prezidênsia Konsellu Ministrus

Sua Exa. Ministru Agio Pereira

Loron 28 fulan-setembru tinan 2016
Otél Timor

Exmu. Señór Deputadu sira

Kolega sira Membru ita-nia Governu nian

Exmu. Reprezentante sira husi Korpu Diplómatiku, Sociedade Sivil no Setór Privadu

Ilustre konvidadu sira

Señora no Señór sira,

Ho ksolok boot tebes maka ha'u mai hamriik iha ne'e hodi hato'o "Relatóriu kona-ba moris-kiak iha Timor-Leste tinan 2014 nian", peskiza datoluk kona-ba nível moris nian iha Timor-Leste.

Ha'u hahii ba Ministériu Finansas ba supervizaun serbisu ida ne'e, ne'ebé hala'o husi Diresaun-Jerál Estatística nian, ho tulun tékniku husi Banku Mundiál.

Dadus no análise ne'ebé iha kualidade di'ak importante tebes ba Governu no atu ita-nia sidadaun sira bele halo avaliasaun ba efikásia husi ita-nia asaun sira. Ita la hatene se ita la'o iha dalan ne'ebé loos, se ita-nia polítika sira iha daudaun ona rezultadu ne'ebé ita hotu hein ka presiza iha mudansa polítika ida – no iha kazu afirmativu, tansá no bainhira maka tenke halo mudansa ne'e – buat hirak ne'e importante tebes ba ukun ida ne'ebé efikás.

Importante tebes atu ita hotu iha hanoin oinsá ita-nia nasaun nia progresu, liuhusi ita-nia sentimentu no esperiénsia. No estudu ida ne'ebé di'ak, dezenvolve di'ak, aplika ho di'ak no ho rezultadu ne'ebé hetan análise ne'ebé di'ak, representa fonte ne'ebé ho rigór atu bele ba kompriede progresu ne'e.

No ita bele dehan katak imajen ne'ebé ita simu kona-ba ita-nia nasaun fó aten-barani duni.

Iha inísiu fulan ne'e, Timor-Leste hetan klasifikasaun hanesan "nasaun sanulu ne'ebé di'ak liu" husi nasaun sira iha mundu ba ninia progresu maka'as ne'ebé hala'o tiha ona iha konversaun kreximentu ekonómiku ba-ihá moris-di'ak, iha períodu 2006 to'o 2014.

Hafoin, iha semana kotuk liu-bá, Timor-Leste hetan klasifikasaun hanesan nasaun ne'ebé "iha progresu maka'as liu" iha mundu tomak iha indikadór sira ODS nian kona-ba saúde, iha períodu 2000 to'o 2015, husi relatóriu ida Nasoins Unidas nian ne'ebé bazeia ba análise detallada ida husi dadus sira objetivu ida ne'e nian.

Ohin loron ne'e ita mai hamutuk iha ne'e atu apresenta "Relatóriu kona-ba Moris-kiak iha Timor-Leste tinan 2014 nian" no, dala ida tan, relatóriu ne'e fó mai ita lia-menon katak progresu boot sira daudaun

ne'e hala'o hela. Maske nune'e, ita mós tenke rekoñese katak sei iha buat barak atu halo, ne'ebé mak sei presiza atu hadi'a tan.

Bainhira ita selebra progresu hirak ne'e, importante mós, ita tenke rekoñese katak progresu ida ne'ebé iha sustentabilidade no eziye ba ita atu kontinua haka'as an atu bele alkansa buat ne'ebé di'ak liu iha tinan hirak tuir mai ne'e.

Ho apresentasaun husi relatóriu importante ne'ebé ohin ami lori mai iha ne'e, Governu hakarak repete fali nina komprimisu ne'ebé firme atu promove transparénsia no atu dudu ba oin partisipasaun husi sidadaun sira hotu-hotu iha prosesu foti desizaun ne'ebé afeta ita-nia nasaun tomak no liuliu kondisaun moris ita-nia povu nian.

Klaru katak relatóriu ne'e, hetan estudu no liuhusi análise akadémiku ida ne'ebé rigoroza - hanesan baibain.

Ministériu Finansas, ne'ebé halibur espesialista sira iha área ida ne'e, hateten katak ida ne'e hanesan estudu ne'ebé iha kualidade aas liu kona-ba nivel moris nian ne'ebé dala-balu halo tiha ona iha Timor-Leste. Dimensaun husi amostra ne'e boot liu husi hirak ne'ebé hala'o iha tinan 2001 no 2007 no dezenvolve tuir téknika estatística daudaun ne'e nian. Pergunta sira ne'ebé halo ba estudu datoluk ne'e hala'o ona durante fulan 12 nia laran, hahú husi fulan-abril tinan 2014 to'o fulan-abril tinan 2015 no inklui uma kain hamutuk 5.916, liu porsentu 30 husi peskiza uluk nian.

Distintu Konvidadu, Señór no Señora sira

Foku husi relatóriu kona-ba hamenus moris-kiak ne'e maka hamenus moris-kiak iha munisípiu idak-idak, ne'ebé uluk hanaran Distritu sira. Prioridade ne'e identifika tiha ona, hahú kedas iha tinan 2002, nu'udar kauza nasional nian ida.

Hafoin luta ba libertasaun nasional besik sékulu baluk haat nia laran no hetan tiha ukun an no soberania, importánsia atu liberta ita-nia povu husi moris-kiak, tenke sai nu'udar objetivu ida ne'ebé mak importante liu. Luta hasoru moris-kiak nafatin sai hanesan ita-nia Governu nia prioridade prinsipál – prioridade nasional ida. Kualidade ne'ebé aas husi relatóriu ne'e, ne'ebé hala'o ona ho rigór akadémiku kontribui duni ba objetivu ne'e.

Ita-nia Planu Dezenvolvimentu Estratéjiku, ne'ebé adota iha tinan 2011, reforsa liután prioridade nasional ida ne'e no akresenta katak Timor-Leste tenke servisu hodi hasa'e nia kategoria hanesan nasaun ne'ebé ho rendimentu mediu-altu sira no, to'o tinan 2030, "sei halakon moris-kiak ka kiak-rabat-rai".

Dadus husi estudu kona-ba nivel moris iha tinan 2014-2015, hatudu redusaun ne'ebé signifika moris-kiak iha nasaun ne'e husi keda tinan 2007. Ministériu Finansas sei halo apresentasaun ida detallada, dadeersan ne'e, hodi fó imajen ne'ebé di'ak liu husi ida ne'ebé maka ha'u koa'lia daudaun ne'e.

Hanesan baibain, relatóriu ne'e bolu atensaun ba faktu katak, bainhira uza liña moris-kiak nasionál nian - ne'ebé representa despeza ba nesesidade báziku atu hetan ai-han, hela-fatin no sasán sira seluk la'ós ai-han, iha Timor-Leste, - proporsaun Timoroan sira ne'ebé moris iha situasaun kiak, tun ona; Timoroan barak liután maka bele sosa sasán no servisu esensiál sira, kompara ho tinan 2007.

Estudu mós hatudu katak, bainhira kompara Timor-Leste ho nasaun barak sira seluk, uza taxa internasionál kona-ba moris-kiak rabat-rai, tun maka'as husi porsentu 47.2 iha tinan 2007 ba porsentu 30.3 iha tinan 2014. Ida ne'e hatudu katak Timor-Leste bele ona hamenus kiak lalais liu kompara ho nasaun sira seluk.

Tuir taxa moris-kiak ne'ebé tun maka'as, indikadór sira seluk ne'ebé hatudu ona iha relatóriu ne'e, hatudu katak iha progresu iha períodu entre 2007 no 2014. Progresu ne'ebé maka'as liu iha nivel nasionál inklui asesu ba eletrisidade, edukasaun ba labarik sira, no rezultadu husi saúde nian di'ak tebes. Aleinde ne'e, bele haree mós melloramentu iha asesu ba facilidade saneamentu no bee moos. Timoroan barak liután mak iha kbiit atu sosa sasán hanesan telemóvel, televizaun no motorizada sira; iha asesu ba eletrisidade signifika katak, ita-nia populasau iha kbiit ona atu sosa sasán elétriku sira hanesan ventuiña no sanan elétriku hodi te'in etu.

Distintu Konvidadu, Señór no Señora sira

Informasaun sira ne'ebé maka rigoroza ne'e importante tebes ba ita hodi halo monitorizasaun ba progresu nasionál husi Objektivu Dezenvolvimentu Sustentavel sira, ne'ebé nia meta sira mak importante liu iha Agenda Nasoins Unidas, ba tinan 2030 nian, iha ne'ebé Timor-Leste hala'o knaar ne'ebé pro-ativu hodi define nia prioridade sira.

Ita-nia Primeiru-Ministru, iha loron sábadu, bainhira nia koa'lia ba dirigente mundiál sira iha Assembleia Jerál Nasoins Unidas nian iha Novaiorke, hateten kona-ba kompromisu Timor-Leste nian atu hatama objetivu sira ne'e iha ita-nia planu no orsamentu sira, hodi halo ita haree katak "ita halo ona mapa kona-ba indikadór sira ba objetivu 17 no hili ona meta 20 ne'ebé sei fó dalan mai ita atu monitoriza implementasaun tuir rezultadu ne'ebé bele sukat.

Ha'u hakarak tebes atu rekomenda relatóriu ne'e ba ita-boot sira; no ha'u agradese ba ema hotu ne'ebé envolve ona, liuliu família timoroan hamutuk 5.916 ne'ebé hatán ona pergunta sira, ba ekipa sira ne'ebé

tun ba baze atu prienxe formuláriu sira, ba ekipa dezvoltimentu no estatística nian no ba autór sira estudu nian.

Dala ida tan ha'u hahii ba Ministériu Finansas, Diretór-Jerál Estatística no Banku Mundiál ba knaar importante ne'ebé maka hala'o tiha ona ho profesionalizmu.

Ita iha aten-barani tebes ho ita-nia progresu sira, hatene kona-ba limitasaun no oportunidade sira relasiona ba dinámika dezvoltimentu nian. Ita-nia objetivu maka la'o ba oin nafatin la hatene kole husi dalan ida ne'ebé kria kondisaun iha Timor-Leste ne'ebé husik ba kotuk moris-mukit nian tanba ita halakon tiha ona. Maski nune'e, ita hatene katak sei iha buat barak atu halo.

Nu'udar nasaun, ita hetan bensaun ho kbiit atu aprende – ita aprende lalais loos. Bainhira tempu liu daudaun, ita la'ós atu aprende di'ak liu de'it buat ne'ebé ita presiza halo, maibé mós oinsá halo di'ak liu – tau uluk nana'in nasaun nia moris-di'ak.

Obrigadu!